

## **Kommunimut pilersaarummut tapiliussap 1C39-1, Sømandshjemmi Nuuk inaarutaasumik akuersissutigineqarnera**

Aalajangiiffigisassaq

J.nr.: ANL-2019-00009

Sanarfinermut Avatangiisinullu Ingerlatsivik – Pisortaq Hans Henrik Winther Johannsen / HHWJ

### **Suliassamik eqikkaaneq**

Kommunimut pilersaarummut tapiliussaq naapertorlugu immikkoortup ilaani pioreersumi 1B1-imi nutaamik immikkoortup ilaanik, 1C39, atugassiisoqarpoq. Immikkoortup ilaa nutaaq C-tut qitiusumik atorneqarsinnaasutut atugassiissutigineqarpoq, tassani kikkunnilluunniit ornigarneqartartunik illoqarfiup qeqqani atuuffinnut tunngasut pilersinneqarsinnaallutik.

Taamaalilluni kommunimut pilersaarummut tapiliussaq Sømandshjemmi pioreersup allilernerneqarnissaanut nutarterneqarnissaannullu periarfissiivoq. Sømandshjemmimut atasumik sanaartorfissanik nutaanik atugassiisoqarpoq, taakkulu nunaminertamik atuisinnaanermut akuersissuteqareersumit taamaallaat atorneqarsinnaassapput.

Ineqarfinnik nutaanik marlunnik, isumasioqatigiinnermut atatillugu inimik kiisalu pisortap inissaanik il.il. sanaartornissamik periarfissiisoqarpoq.

Suliaq Sanarfinermut Avatangiisinullu Ataatsimiititap 15. juuni 2020-mi ataatsimiinnerani oqaluuserineqarpoq, ataatsimiititallu inassuteqaat akuersissutigaa suliarlu akuersissutigisassanngorlugu Aningaasaqarnermut Inuussutissarsiornermullu Ataatsimiititamut kiisalu Kommunalbestyrelsimut inaarutaasumik akuersissutigisassanngorlugu ingerlateqqillugu.

### **Inassuteqaat**

Sanarfinermut Avatangiisinullu Ataatsimiititap Aningaasaqarnermut Inuussutissarsiornermullu Ataatsimiititamut inassuteqaatigaa:

- kommunimut pilersaarummut tapiliussaq, 1C39-1, Sømandshjemmi, Nuuk, akuersissutigineqassasoq
- suliaq inaarutaasumik akuersissutigisassanngorlugu Kommunalbestyrelsimut ingerlateqqinneqassasoq

### **Suliassamik saqqummiussineq**

Kommunimut pilersaarummut tapiliussaq naapertorlugu immikkoortup ilaani pioreersumi 1B1-imi nutaamik immikkoortup ilaanik, 1C39, atugassiisoqarpoq. Immikkoortup ilaa nutaaq C-tut qitiusumik atorneqarsinnaasutut atugassiissutigineqarpoq, tassani kikkunnilluunniit ornigarneqartartunik illoqarfiup qeqqani atuuffinnut tunngasut pilersinneqarsinnaallutik.

Taamaalilluni kommunimut pilersaarut Sømandshjemmi pioreersup allilernerneqarnissaanut nutarterneqarnissaannullu periarfissiivoq. Sømandshjemmimut atasumik sanaartorfissanik nutaanik atugassiisoqarpoq, taakkulu nunaminertamik atuisinnaanermut akuersissuteqareersumit taamaallaat atorneqarsinnaassapput.

Ineqarfinnik nutaanik marlunnik, isumasioqatigiinnermut atatillugu inimik kiisalu pisortap inissaanik il.il. sanaartornissamik periarfissiisoqarpoq.

Immikkoortoq sanaartorfissanut pingasunut immikkoortunut agguagaavoq, tassanilu assigiinngitsunik portussusilinnik sanaartortoqarnissaanut akuersissuteqartoqarsinnaavoq:

Sanaartorfissaq A-mi quleriit sisamat tikillugit atuuppoq  
Sanaartorfissaq B-mi quleriit pingasut tikillugit atuuppoq  
Sanaartorfissaq C-mi quleriit marluk tikillugit atuuppoq  
Ini alleq quleriinni siullertut atuuttuaannarpoq.

Taamatut assigiinngisitsinikkut nunap ilusaa ersarinnerulissaaq, avatangiisinullu kusanartumik, assigiinngisitaartumillu ataqatigiissaartutut isikkoqalerluni.

### *Aaqqiissutissatut siunnersuut – suliatigut naliliineq*

Kommunimut pilersaarummut tapiliussaq immikkoortup pitsaassussaata nalilerneqarnera, qaqqamut immamullu isikkivik, silamiittut pitsaasut silamilu uninngaartarfiit toqqammavigalugit sularineqarpoq. Pilersaarummut tapilussap immikkoortup atorneqarsinnaaneranut tunngatillugu attaveqaatit, qaqqami immikkuullarissumik inissisimanera, kiisalu siunissami atorneqarnissaanut kissaataasut eqqarsaatigineqarput.

Taamaattumik ingerlatsiviup Illuliortaatsimut politikimi naleqartitanut kommunimut pilersaarummut tapiliussaq naapertuuttoq nalilerpaa, immikkoortuni tulliuttuni:

#### **Illuliortaatsimut politikki**

#### **Nunarsuarmioqatigiinnut anguniakkat:**

- 1 **Illuliortaaseq kinaassuseqalersitsisoq:**  
Siunnersuummi sanaartornermut tunngasut kiisalu immikkoortup ilusaa eqqarsaatigineqassasoq oqaatigineqarpoq.



**SDG 11.4:**  
Kulturikkut pinngortitamillu kingornussagut illersussavagut pioreersup Mågehusip qaqqajunnamilu pinngortitap ilusaa innimigalugit.

- 2 **Illoqannginersat illoqarfimmilu inuuneq:**  
Illut uiguleriit akornatigut kujammut sammisumik oqquartamik pilersitsinikkut tamanut ammasumik isikkivigissumik illoqannginersamik pilersitsisoqarsinnaavoq.



**SDG 11.7:**  
Isumannaatsunik tamanit silami uninngaartarfiusinnaasumik pilersitsinermut tunniussaqaqataassaagut - tamanut ammasumik.

- 3 **Piffissaq sumiiffillu:**  
Siunnersuummi nuna pioreersoq ataqqineqarnissaa atorluarlugulu illuliortaatsimik soqtiginartumik pilersitsisoqarnissaa allassimavoq.



**SDG 12.2:**  
Qaartiterinerup annikinnerpaaffianiitinneratigut atorluaasoqarlunilu pinngortitami isumalluutit piujuartinniarlugit suliaqartoqassaaq.



**SDG 15:**  
Pinngortitap pioreersup ataqqineratigut uumassusillit assigiinngisitaarnerat pinngortitamilu inuuneq qulakkeernissaanut tapersiisoqassaaq.

### *Aningaasatigut sulisoqarnikkullu naliliinerit*

Kommunimut pilersaarummut tapiliussamik suliaqarneq aningaasaqarnikkut kinguneqassanngilaq.

### *Inatsisitigut tunngavissaq allakkallu tunngaviusumik uppernarsaatitallit*

- Pilersaarusiorneq aamma nunaminertat atorpeqartarnerat pillugit Inatsisartut inatsisaat nr. 17, 17. november 2010-meersoq aamma
- Inatsisartut inatsisaat nr. 34, 9. december 2015-imeersoq
- Kommunimut pilersaarut digitaliusoq [www.sermersooq2028.gl](http://www.sermersooq2028.gl)

### *Ingerlariaqqinnissaq*

Kommunimut pilersaarummut tapiliussap akuersissutigineqareernerata kingornatigut nunaminertamik inniminniisoqarsinnaanngussaaq pilersaarummut tapiliussami aalajangersakkat malillugit.

### **Aningaasaqarnermut Allatseqarfimmit oqaaseqaatit**

Aningaasaqarnermut Allatseqarfik oqaaseqaatissaqanngilaq

### **Innuttaasunik peqataatitsineq/attaveqaqatigiinneq**

Kommunimut pilersaarummut tapiliussaq sapaatip akunnerini arfineq-pingasuni tusarniaassutigineqarnikuvoq aammalu tusarniaassummut akissuteqaat marluk pissarsiarineqarput. Taamaattorli allannguinnissamut pissutissaqartitsinngillat.

### **Ingerlatsivinnit allaniit oqaaseqaatigineqartut**

Soqanngilaq

### **Siusinnerusukkat aalajangernerit**

*Sanarfinermut Avatangiisinullu Ataatsimiititap 15. juuni 2020-mi aalajangiinera:*  
Inassuteqaat akuersissutigineqarpoq

### **Ilanngussat**

1. Tusarniaanermut akissutinik suliaqarneq
2. Tusarniaanermi akissutit tiguneqartut
3. Kommunimut pilersaarummut tapiliussaq 1C39-1, Sømandshjemmi, Nuuk